

# Gálatas

---

## **Pablo ishim Porrosht aabo ör saludo.**

**1** <sup>1</sup>Yok Pablo. Yok apóstol. Ye oso odibite yok petikni par apóstol hn nīhyok ye yeék tīr yok par uje tatim yok par uje yok apóstol. Shi Jesucristo hn ir Deych Porrosht wir uje ochibite yok par apóstol. Ir Deych Porrosht wichi uje shuu Jesús ikponi. <sup>2</sup>Yok hn nos wir Porrosht aabo uje ode lika pahir oyichew ana hutita oyosim nos wir olak uje olak dechi erze iglesya kihniya uje de wahacha ese hñimich Galacia. <sup>3</sup>Sehe tuu eyok Deych Porrosht hn eyok Irhīch Jesucristo odosir olak hn oduhu olak aho kiis. <sup>4</sup>Jesucristo ishim ire osokite par uje oshuu oshuu toy par uje ishi eyok hñitewihi Porrosht ahir, par uje ye yukwīya erze oso uje Porrosht sepyēr ör nehe pork nos oso ör iluu mīhnū. Eyok Deych Porrosht sahmūr uje Jesús shiyokōr par eyokkite shuu itsorz. <sup>5</sup>Sehe shish tuu oso oteeychāha Porrosht. Uje oniyokōr oduhu ilorz ich ihīrtpa.

## **Shi Cristo pwele shuu omasaha par Porrosht aabo.**

<sup>6</sup>Ich uhulo tish pibe uje sehe moymlo Porrosht shichish. Wichi uje chihla olakni par uje ye otiislo Cristo hn shuu amsahalo par olak ir aabo. Ele ahle sehe moymlo Porrosht ahwoso hn ichii ye otiislo erze oso ör ahwoso kināho hn olak ebitilo uje amsahalo par olak Porrosht aabo uhulo itsorz. <sup>7</sup>Nīhyok ahwoso kināho uje shuu omasaha par Porrosht aabo, shi Jesucristo nohmira. Per ode uje oshiyokos olak, sehe oduhu Jesucristo ir ahwoso poshik. <sup>8</sup>Titim olakni uje shi tyenij ye otiislo Jesucristo par uje amsahalo par olak Porrosht aabo. Kimiji ōryok oyitim olak ahwoso uje kināho, o kimiji anjel uje tāra poōrc tatim olak ahwoso uje kināho, ich sehe tuu Porrosht lajir ör ikiyo. <sup>9</sup>Titim olakike ich titim olakpo. Kimiji yeék nanimirāha ahwoso kināho tatim olak dehet yet par uje amsahalo par olak Porrosht aabo ye ilo uje titim olakni ich sehe tuu Porrosht lajir ir ikiyo. <sup>10</sup>Ye titim osope tuu itsorz shi par uje tuu otsahmūr yok. Shi titim ör uje itsorz pork Porrosht sahmūr uje itsorz. Ye titim osope par uje tuu ör aho kiisihī yok. Kimiji titim ör shi par uje tuu ör aho kiisihī yok ich ye yok Cristo ir ibikpe.

**Porrosht shuu Pablo masaha par apóstol.**

<sup>11</sup>Pishibo watsaklo, sehe tuu erahalo uje ahnūwo ahwoso uje titim olakni uje Jesús ishi oso ōr hñitewihi Porrosht ahir, ahnūwo ahwoso ye tāra oso ōr eyuwope. <sup>12</sup>Ye oniyokorāha yokpe hn ye otatim yokpe uje Jesús ishi oso ōr hñitewihi Porrosht ahir. Shi Jesucristo wichi uje tatim yok par uje titim erze oso.

<sup>13</sup>Olak ich entloni uje wapkite tikeeychāha Porrosht tuu yok itso pihnapso israel oso uje oteeychāha Porrosht. Porrosht aabo ōr eyuwo kināho, ye ilo oryōkpe, heke tinaha yok uje tiyokōr mihnuwōho ōr pork sehe tihna ōr. <sup>14</sup>Yok ich ma tikeeychāha Porrosht je erze pihnapso uje ōr āyo itso yok. Ich tahmūrpa uu ōryok poruwo wishi ōr ahwoso. <sup>15</sup>Uje ehn yahpaa yok shurhāpe ich Porrosht chiihla yok shi pork sahmūr yok <sup>16</sup>par uje shuu tikiraha Deyjit heke tokoym yok poruwo wishi ōr iluu hn tomsaha par yok Porrosht aap hn shuu tanimirāha lahwoso titim erze dihipo kināho uje Jesús ishi ōr hñitewihi Porrosht ahirkite. Ich ye tapur yeēk par uje tuu shiyokorāha yok. <sup>17</sup>Ye titir dit Jerusalén petikni par tekirihī erze uje wap ichii ōr apóstole par uje tuu oshiyokorāha yok. Shi titir wahacha hñimich Arabia, hn uje tikitokolihichis Arabia ich takaashpo titir dit Damasco.

<sup>18</sup>Uje ich terihi tre āyo hn tikitolihi dit Damasco hn titir dit Jerusalén par uje tekirihī Pedro. Tiyakaha wichi ahir nehech daalo kinse <sup>19</sup>per ye tokomo apóstole yewope. Shi tokomo Santiago uu eyok Irhich Jesucristo leshibich. <sup>20</sup>Ahnūwo ahwoso uje tichew tibite ana hutita tokosim olak ich ūru. Titim olakihī Porrosht ile ikich uje ye titim olak pukushīpe. <sup>21</sup>Uje tikitokolihī ese dit Jerusalén ich titir hñimich Siria hn hñimich Cilicia. <sup>22</sup>Porrosht aabo uje ode lekityo ese hñimich Judea ye onomo yokpe. <sup>23</sup>Shi ochunt uje antni tiyokōr mihnikihī Porrosht aabo. Sehe tihna erze uje ye olotiis Jesucristope, per ochunt uje ele ahle ich tanimirāha Porrosht ahwoso titim ōr par uje ye olotiis Jesucristo. <sup>24</sup>Heke onina Porrosht uje ochunt uje yesh tanimirāha ir ahwoso.

**Erze apóstole otsahmūr Pablo.**

**2** <sup>1</sup>Uje ich terihi katorse āyo hn takaashpo titir Jerusalén. Bernabé hn Tito ōya yok. <sup>2</sup>Titir wahacha pork Porrosht shuu tikiraha uje sehe duhu titir wahacha. Uje oyaachihī Jerusalén hn ōryok hn erze Porrosht aabo ōr bahluwo uje otibey Porrosht aabo oyakisho ōryok owich. Shi ōryok uje oyakisho ōryok owich, ye Porrosht aabo yewope. Titim ōr erze Porrosht ahwoso shiyeye wir uje tanimirāha titim erze dihipo kināho pork sehe tikiraha kimiji erze ōr bahluwo onahmūr par uje ye tokole uje ye jukur erze pibiyo uje tiyokōrni hn yesh tiyokōr. <sup>3</sup>Uje titim ōr tuu itsorz ich imeheeych uje ye Porrosht aabo ōr nesitpe asa yarta waa je iich otsii

sirkunsisyon par uje ochibite òr pork Tito de pahir uje oyakisho òryok owich itsorz. Wichì griyegoya per ye odìrok irpe par uje oshuu ochibite asa yarta waa je iich otsii sirkunsisyon. <sup>4</sup>Somiramo òya Porrosht aabo uje ochibite uje òr ire Porrosht aabo per ye òr Porrosht aabope. Shi sehe odìraha Porrosht aabo òr eyuwo kimiji oniyokòr asa ley waa je Moisés chichewkite o kimiji ye oniyokòrpe par shuu omasaha par Porrosht aabo o shi pork ye otsotiis Jesucristope ich omasaha par Porrosht aabo. Sehe odìbite par uje Porrosht aabo oshiyokòr asa ley uje Moisés chichewkite. <sup>5</sup>Ye yuhu odiilehet ma pork erze òr ahwoso ich ye ùrpe, hn ye oyosim òr hniì pikaap par uje oshuu Jesucristo ir ahwoso poshik pork sehe oyuhu Jesús ir ahwoso shish ùru par olak.

<sup>6</sup>Porrosht aabo òr bahluwo ye onishii pahwosope pork erze uje tanimirāha ich ye poshikpe, ich ùru. Par yok ich ye latikish kimiji òr ire òr bahluwo o kimiji ye òr bahluwope pork par Porrosht ich nos òr itsye. Ye duhu òr kināhope. <sup>7</sup>Per ochiraha uje Porrosht chihla yok par uje tanimirāha ir ahwoso titim erze dihipo kināho uje Jesús ishi òr hnitewihì Porrosht ahirkite shi itso uje Porrosht ishim Pedroni par uje sanimirāha ir ahwoso tatim erze israel oso. <sup>8</sup>Imeheeych uje Porrosht chihla Pedro hn yok par apostole pork shuu Pedro ibiyo tokole om erze israel oso òr ahìr hn shuu pibiyo tokole om toy uje yok dechì dihipo kināho òr ahìr. <sup>9</sup>Santiago, Pedro hn Juan wir uje Porrosht aabo ochibite uje ich òr deyo. Uje Santiago hōr ochiraha uje Porrosht takashim yok uje tiyokòr erze pibiyo ich oyeychye hme hn oteycha Bernabé hmata toy par yar, par uje shish oyitìr erze dihipo kināho òr hnìmo hn oyanimirāha Porrosht ir ahwoso, hn wir shish otsanimirāha Porrosht ahwosoho israel oso òr hnìnich. <sup>10</sup>Otsapur òryok par uje òryok eyucha erze losuhlaabo. Wir uje shish sehe takashim òr.

### **Pedro ehèt yūhurash wahacha dīt Antioquía.**

<sup>11</sup>Uje Pedro hno tìr dīt Antioquiani ich titimihì ire erze oso òr ikich pork chimehì uje shiyokòr. <sup>12</sup>Antni Santiago shuu nahìre otìr Antioquía. Uje ehn yahpaa otaachihì Pedro ahìr ich Pedro shish taakihì erze dihipo kināho òr ahìr. Uje erze oso otaācha hn Pedro tokolihì erze dihipo kināho òr ahìr. Ye nōya òrpe pork tola wir nahnapsò israel oso, <sup>13</sup>hn erze Porrosht aabo yewo uje wir israel oso otseēt uje Pedro shiyokòr nehech Bernabé seēt òr toy uje òr ire oshiyokòr. Wir òr aho yūhìrsh. <sup>14</sup>Uje takachim uje ye oniyokòrpe uje Porrosht ahwoso tata uje ich ùru ich titim Pedroho erze oso òr ikich too: —Owa israel os per ahakòr shi uhu owa itso dihipo kināho hn ye ahakòrpe uje erze israel oso oshiyokòr. ¿Inaapo heke sehe uhu erze dihipo kināho oniyokòr shi oduhu ire ilo uu israel oso òr iluuta?—

<sup>15</sup>Uje òryok shūrha ichii òryok israel oso. Ye òryok dihipo kināhope uje oshiyokòr kuche mihñūwo. <sup>16</sup>Yìraha uje nìhyok ye latik pwele

ishi ir hñitewihi Porrosht ahir shi pork shiyokõr erze ley uje Moisés chichewkite. Shi uje ye olotiis Jesucristo ich ishi õr hñitewihi Porrosht ahir, heke eyok ye yotiis Jesucristope hn ishi eyok hñitewihi Porrosht ahir. Jesús ye doshi õryok hñitewihi Porrosht ahir pork oyiyokõr asa ley waa je Moisés chichewkite. Nihyok ye latik pwele ishi ir hñitewihi Porrosht ahir shi pork shiyokõr asa ley waa je Moisés chichewkite. <sup>17</sup>Ye yotiis Jesuspe heke ishi eyok hñitewihi Porrosht ahir. Ele ahle kimiji yiyokõr uje mihñüwo ¿je Jesucristo wichi uje duhu yiyokõr mihñüwo? Ye duhu yiyokõrpe. <sup>18</sup>Antni tibite uje yok Porrosht aap pork tiyokõr uje erze ley tata per ye yok Porrosht aappe. Shi uje ye tokotiis Cristo ich tomsaha par yok Porrosht aap. Kimiji takaashpo par uje tiyokõr erze leypo par shuu yok Porrosht aap ich tuu imeheeych uje tiyokõr mihñik. <sup>19</sup>Erze ley uje Moisés chichewkite shuu tikiraha uje shish timehĩ pork tikiyuwe Porrosht ir ley tuu itsorz heke tokoym erze ley shi itso uje tikiti hn ye tokotiis Jesús par uje ishi yok hñitewihi Porrosht ahir par uje tiyokõr uje ire sahmür. Shish pikirĩt dechi Porrosht ahir. <sup>20</sup>Uje Jesucristo tooho krus eeych ich shi itso uje tikiti tokõya ire pork tokoympa tiyokõr mihñüwo hn ele ahle uje yesh yok ika ye par uje tiyokõrpe uje shi yok tahmür. Shi yok ika par tiyokõr uje Jesucristo sahmür, hn ye tokotiis Porrosht Ijĩtpe shi pork wichi sahmür yok heke ishĩm ire oso par uje oshuu oshuu toy par sosir yok. <sup>21</sup>Porrosht shuu deyjit tĩrĩt par uje ishi yok hñitewihi dahir. Kimiji yeẽk niyokõr uje erze ley tata par uje ishi ir hñitewihi Porrosht ahir ich shuu tokole uje ye jukur uje Cristo toy. Ye tiyokõrpe tuu itsorz.

### Ye ley duhu õr Porrosht aabope.

**3** <sup>1</sup>Olak uje ebuhulo ese hñimich Gálatas ¿jeolak totihlo? ¿Yeẽkpo sehnýer olak hn shuu otiislo uje ich ũru? Uje oyanimĩrãha Porrosht ahwosni ich oyuhu imeheeych uje Jesucristo tooho krus eeych par ishi eyok hñitewihi Porrosht ahir. <sup>2</sup>Sehe tuu atĩmlo yok ahñüwo uje tyenij titim olake. Porrosht ishĩm olak Dechĩbichni. ¿Je dosim olak Dechĩbichni shi pork ahakõrlo erze ley uje Moisés chichewkite, o dosim olak shi pork ye otiislo Jesucristope? <sup>3</sup>¿Je olak totihlo? Uje amsahalo par olak Porrosht aabo hn ishĩm olak Dechĩbich uje takashĩm olak, per ele ahle ich olak koswãha. Sehe uhu olak iluu om ěra olak ukurbo, ye ěrlo Porrosht Ichĩbichpe. <sup>4</sup>¿Kimiji moymlo Porrosht nehe ich tokole uje ye jukur erze uje olak ewentni? Nos olak ewentni erze kuche mihñüwo uje tĩr olak pork olak Porrosht aabo. Tokotiis uje moymlo uhulo itsorz. <sup>5</sup>Porrosht ishĩm olak Dechĩbich uje shiyokõr kuche olak ahir uje nihyok ye latik pwele niyokõr. ¿Duhu inaapo uje shiyokõr shuu itsorz? Ye niyokõrpe duhu ilorz shi pork ahakõrlo asa ley waa je Moisés chichewkite per shi shiyokõr pork ye otiislo Jesucristope.

<sup>6</sup>Tĩteẽta Abraham. Shi pork ye lotiis Porroshtpe heke Porrosht ishi ir hñitew hn shuu ire owich de ahir. <sup>7</sup>Ich imeheeych par eyok uje nos wir

erze uje ye olotiis Porroshtpe wir shi òr itso Abraham aabo. <sup>8</sup>Porrosht ahwoso shuu imeheeych uje deeych yet nehe hn ishi òr hnitew erze oso uje ye òr israel yewope per shi kimiji ye olotiis irpe heke Porrosht tatim Abrahamkite uje Cristo tyenij shiyokòr uje tatim ire im: —Shi pork ye otiis yokpe heke nos tokosir wir dihip kināho.— <sup>9</sup>Heke imeheeych uje nos wir erze uje ye olotiis Porrosht ich Porrosht sosir òr shi itso uje sosir Abrahamkite pork wichi ye lotiis irpe. <sup>10</sup>Nos wir erze uje ochibite uje shi tyenij oshiyokòr asa ley waa je Moisés chichewkite par uje shuu òr owich de Porrosht ahir, wir uje Porrosht sajir òr ikiyo pork ir ahwoso tata shuu itsorz im: —Nos sajir wir òr ikiyo erze uje oyuwe hn ye nos oniyokòrpe erze ley uje Moisés chichewkite.— <sup>11</sup>Ich imeheeych uje nīhyok ye latik pwele ishi ir hnitewihi Porrosht ahir shi pork shiyokòr erze ley uje Moisés chichewkite pork Porrosht ahwoso tata shuu itsorz im: —Shi erze uje ye olotiis irpe ich nīhyok òr hnitew uje de Porrosht ahir heke òr owich de ire ahir.— <sup>12</sup>Kimiji olotiis o kimiji ye olotiispe ich shi itsye par erze ley uje Moisés chichewkite, pork Porrosht ahwoso tata shuu itsorz im: —Kimiji yeēk nos niyokòr erze ley uje Moisés chichewkite hn ye sowe ich ir ikirit de Porrosht ahir.— <sup>13</sup>Nīhyok yeēk pwele shiyokòr shuu itsorz heke Cristo chiyuhu eyok par uje ye lajir eyok ikiyope shuu itsorz. Porrosht ahwoso tata toy uje tyenij sajir yeēk ikiyo uje oso ochowish ochibite pohorrza eeych heke òr ahwoso uje otsajir eyok ikiyo ich nos noshāha Cristo. <sup>14</sup>Heke Jesucristo shiyokòr shuu itsorz par uje erze ahwoso omo uje Porrosht chibite tatim Abraham masaha dihipo kināho toy shi pork ye yotiis irpe heke Porrosht ishim eyok ese Dechibich toy uje tatim Abraham par uje ishim ire.

### **Porrosht chibite lahwoso tatim Abrahamkite.**

<sup>15</sup>Pishibo watsaklo, sehe titeēta titim olak kuche. Uje oso ochibite lahwoso par uje sehe oniyokòr kuche hn ochichew ochibite hutita hn ochibite deeych uut par uje shuu ūru ich ye pwelpe uje shuu erze ir hute tokole uje ye jukur hn ye pwelpe uje chibite ma pork ochichew ochibite deeych uut. <sup>16</sup>Erze uje titeēta tata shuu itsorz. Porrosht chibite lahwoskite uje tatim Abraham hn ese uje tāra ire. Porrosht ahwoso ye tatpe im: —Erze,— duhu kihniya. Shi tata im: —Ese— uje sohmira. Wichi Cristo. <sup>17</sup>Porrosht chibite lahwoskite uje tatim Abraham shuu itsorz. Uje terihi kwatro syento treynta āyokite hn ishim Moisés erze ley par uje sanimirāha tatim erze israel oso. Erze ley ye pwelpe uje duhu erze Porrosht ahwoso ye jukur uje tatim Abrahamkite. <sup>18</sup>Ye eyok owich chihī Porrosht ahirpe shi pork yiyokòr erze ley uje Moisés chichewkite. Kimiji yomsaha yuhu itsorz ich erze ahwoso uje Porrosht chibite tatim Abraham ich ye jukur, per Porrosht chibite lahwoskite uje shi ishimihī Abraham ir owich uje de ire ahir.

<sup>19</sup> ¿Inaapo heke Porrosht shuu Moisés chichew asa leykite? Shi shuu shiyokōr par uje oso ochiraha uje nos oyuwe asa ley hn oshiyokōr uje ich mihñūwo. Asa ley ichii dekite nehech Cristo taācha, pork Porrosht tatim Abrahamkite uje tyenij Cristo tāra ire. Porrosht tatim anjele par uje otatim Moisés erze ley par uje sanimirāha tatim erze israel oso. <sup>20</sup> Shi Porrosht sohmira uje chibite lahwoskite tatim Abraham, per par uje Porrosht ishim erze oso asa ley wichi ye shi tatim ōrpe. Tatim anjele par uje otatim Moisés par uje sanimirāha tatim oso, heke erze ahwoso uje chibite par Abraham ich ma dich pork Porrosht uje keytkēr. <sup>21</sup> ¿Je asa ley pwele sontew erze Porrosht ahwoso uje chibite tatim Abrahamkite? Ye pwele nontpe. Kimiji asa ley pwele shuu oso ōr ikirīt de Porrosht ahir uje yelij nihna ire ich ōr pwele oshiyokōr asa ley par uje shuu ōr ikirīt de Porrosht ahir, per ye ōr pwelpe oshiyokōr oshuu itsorz. <sup>22</sup> Per Porrosht ahwoso tata uje nos oso oshiyokōr uje mihñūwo, heke shi erze uje ye olotiis Jesucristo ich Porrosht chibite lahwoso par shuu ōr owich de dahir.

<sup>23</sup> Uje ehn yahpaa Cristo taācha petikni ichii ley sontew eyok uje yiyokōr erze mihñūwo hn tibey eyok par uje terihi ishirīt uje Cristo taācha hn ye yotiislo ire. <sup>24</sup> Uje ehn yahpaa Cristo taācha hn asa ley tibey eyok par uje shuu ye yotiislo Cristope par uje wichi ishi eyok hnitewihi Porrosht ahir. <sup>25</sup> Cristo taāchni heke ye yotiislo irpe hn asa ley ye tibey eyokpe. <sup>26</sup> Jesucristo nos shuu olak Porrosht aabo pork ye otiislo irpe. <sup>27</sup> Nos wir olak uje otohirm olakni uje ye otiislo Cristope ich uhulo olak iluu shi itso Jesucristo ir iluu. <sup>28</sup> Ye latikish kimiji owa israelya, o kimiji owa dihip kinaha, hn ye latikish kimiji owa ōr yilak o kimiji ye ōr yilakpe. Kimiji owa hnakirap o kimiji owa timchar ye latikish pork nos olak itsye uje akashilo Jesucristo. <sup>29</sup> Uje Cristo wichi olak yinsirc ich tokole shi itso uje olak ārlo Abraham, heke ahñūwo ahwoso uje Porrosht chibite tatim Abrahamkite ich nos wir par olak.

**4** <sup>1</sup> Ahñūwo uje titeēta titim olakike tata shuu itsorz. Uje ehn pikihnint ijaap hn ir deyeh toy ich nos wir ir kushjāro wir par ire per ye pwele tibeype erze ir kushjāro pork yesh ijaap. Heke tyenij shuu yet tibey ir kushjāro nehech terihi leherc. Wichi shi itso uje ōr yilak per wichi uu kushjāro yinsirc. <sup>2</sup> Hnakirbo ode uje otibey wichi kushjāro hn otibey wichi toy pikihnint nehech terihi ishirīt uje ir deyeh chibitni par uje erze hnakirbo oshim wichi ir kushjāro. <sup>3</sup> Titeēta erze kuche uje tokolihi ese pikihnintni wir shi itso uje tokolihi eyokloni. Shi eyok itso ese pikihnint. Uje ehn wichi ijaap shi otibey nehech dich, hn erze ley uje anjele oshim Moisés wir shi itso uje tibey eyok, <sup>4</sup> per uje terihi ishirītkite hn Porrosht shuu Deyjit tirēt. Shuu tāra asa timcharrza. Erze ley shish dekite par uje ire shiyokōr <sup>5</sup> par uje ishi ōr hnitew erze uje shi ōr prowa oshiyokōr erze ley par uje shuu omasaha par Porrosht aabo. <sup>6</sup> Ele ahle ich olak Porrosht

aabo heke Porrosht shuu Deyjit Ichibich masaha olak aho. Porrosht Ichibich tata shuu itsorz im: —Dii Porrosht— heke olak tyenij atimlo Porrosht uhulo itsorz toy: —Dii Porrosht.— 7 Porrosht shuu amsahalo par olak ir aabo heke ele ahle ich ye olak ilo uje ör yilope shi pork olak prowani uje ahakörlo asa ley par eshi olak hnitewihi Porrosht ahir. Ele ahle ich olak Porrosht aabo, heke erze Porrosht ir kushjäro uje de ire ahir wir par olak toy.

8 Uje ehn yahpaa erahalo Porrosht petikni ich shi ahakörlo wir ör ibiyo erze porrosht kinäho uje ye Porroshtpe. 9 Ele ahle ich erahalo Porrosht. Ma om uje titim olak uje Porrosht chiraha olak. ¿Inaapo heke sehe eeshlopo ahakörlo erze ley uje anjele oshim Moisés? Wir ye ukurbirsh hn nīhyok ir kushjäro. ¿Inaapo heke sehe amsahalo uhulo olak itso uje ör yilopo? 10 Ich olak narim uje terihi erze daalo hn shekurko hn ishīryo hn äyo itso uje olak ir yilopo. 11 Ich shuu peyuwo tisir erze pibiyo uje tiyokorāha olak uje yok de olak ahirni, kimiji moymlo ich ye jukur. 12 Pishibo watsaklo, sehe tuu olak ilo yok. Shi ye tokotiis Cristo par tomsaha par yok Porrosht aap. Shi yok itso olak pork antni asa ley uje Moisés chichewkite ich nihyokihi olak ahir hn ele ahle ich yok itspo, ich ye yok ir yilakpe. Ye ahakorihilo yok kuche petikni uje mihnuwo.

13 Erahalo uje wapni shi pork yok permo heke titir olak hn tiyakaha olak ahir. Uje yok dechi ich tanimirāha Porrosht ahwoso titim olak uje Jesucristo ishi olak hnitewihi Porrosht ahirkite. 14 Ese permit uje chishew yok ich olak ewenta hn ye etaklo yokpe. Shish ahmürlo yok shi uhulo yok itso uje yok Porrosht ir anjel. Ahmürlo yok shi uhulo yok itso Jesucristo. 15 Wap uje yok dechi ich shish olak aylpa per ele ahle ¿inaapo heke ye olak aylihi yokpe? Tikiraha uje sehe akashimlo yokni nehech sehe eyuhu olak ile eyhi par asimlo yok par timchaha pile per ye olak pwele osirlo yok uhulo itsorz. 16 ¿Ele ahle je eeylo yok olak imāha shi pork titim olak uje ich ūruni?

17 Erze oso oshiyokör oshuu itso uje otsahmür pishi olak per ör eyuwo kinäho. Ye ūrpe. Shi sehe oduhu moymlo öryok hn ahmürlo ör. 18 Ich om uje otsahmür olak per ye ompe uje shi oshuu daho yūhirsh. Ich tyenij oshuu ūru uje otsahmür olak itso yok uje tahmür olak. Shish tahmür olak ye shi uje yok de olak ahirpe. 19 Pishibo watsaklo, shi olak itso pijo. Ele ahle ich uhulo yok dosopo. Shi uhulo yok itso uje timcharrza ijit tabita pork terihi ishirit uje ijit shūrha. Shish tukuuna uje ich dospa uje tiyem uje olak iluu tokole shi itso Jesucristo ir iluuta.

#### Agar hn Sara wir shi ör itso Porrosht ahwoso osiyer.

20 Sehe tuu yok chihni olak ahirpo hn tikitkēr olak titim olak uje ma om. Shish tuu peyuwo tisir olak. 21 Olak uje sehe ahakörlo asa ley waa je Moisés chichewkite sehe tuu atimlo yok. ¿Je erahalo inaapo heke

Porrosht chibite asa ley? <sup>22</sup>Porrosht ahwoso tata uje Abraham ir aabo odekite ör osiyer. Uu ir ijit yet shi tãra ör yilta hn uu ir ijit yet tãra waa irãhta pishta. <sup>23</sup>Ese ir ijit yet uje tãra waa je ör yila shi shürha itso erze pikihnino yewo uje nos ör shürha, per ese ir ijit yet uje shürha tãra asa ir irãhta pishta. Shürha par uje shuu Porrosht ahwoso yakaha uje chibite tatim Abrahamkite uje ishim ör ijit. <sup>24</sup>Erze timcher uje ör otiyer wir shi ör itso erze ahwoso osiyer uje Porrosht chibitkite. Asa ör yilta wate shi itso erze ley uje Porrosht tatimihi Moisés wahacha kojach Sinaikite. Wate iich otsii Agar. Uu ir ijit wichi shi ör yilak. <sup>25</sup>Shi Porrosht siteëta asa Agar ese kojach Sinaí uje dechi hnimich Arabia. Ese kojach wichi owich uje Porrosht ishim Moisés erze leykite. Hn siteëtpo uje asa Agar wate shi itso ese dit Jerusalén, hn erze oso uje odechi shi ör itso yilo pork shish sehe oniyokör erze ley par uje omasaha par Porrosht aabo. <sup>26</sup>Waa Jerusalén ahлта waa je de poörc wate shi itso uje Porrosht aabo ör lati. Ich nĩhyok uje ör yilo odechi <sup>27</sup>pork Porrosht ahwoso tatim asa timcharrza im:

—Owa uje owa ebir ye eyjirsh ich tyenij owa aylpa hn ebich. Ye eenape erze uje ich doso uje aabosh, per ele ahle tyenij owa aylpa pork ma tokosim owa aabo je asa waa je shi ir abich shuu aabosh.—

<sup>28</sup>Pishibo watsaklo, Porrosht chibite lahwoskite uje tyenij Isaac shürha hn chibite lahwoso toy par uje shuu eyok shurhãpo heke eyok shurhãpo itso Isaac, <sup>29</sup>per Agar ye ebirpe, heke ir ijit shurhãkite shi itso duhu pikihnino yewo uje oshürha, hn ir ijit shiyokör mihnikĩhi Sara ir ijit uje shürha pork Porrosht chibite lahwoso par uje shürha. Ele ahle ich oso oshiyokör shi itso ör. Erze uje ye odiraha Porroshtpe oshiyokör mihnikĩhi Porrosht aabo. <sup>30</sup>Porrosht ahwoso tata uje Porrosht tatim Abraham im: —Eyuhu wate ejwert asa elta hn ir ijit. Ich ye ompe uje otsehek erze kushjãro hn oshim pit yet asa elta ir ijit hn oshim pit yet asa erãhta pishta ir ijit.— <sup>31</sup>Pishibo watsaklo, ich ũru uje titim olak. Ich ye eyok ilope asa ör yilta ir ijit. Shi eyok itso asa irãhta pishta ir ijit.

#### Ye ompe ocheeshpo oshiyokör erze ley.

**5** <sup>1</sup>Cristo chiyuhu eyokihi erze ley par uje ye erze ley dii eyok deloho, heke ye ompe uje eeshlopo ahakörlo erze ley uhulo olak itso uje ir yilopo. <sup>2</sup>Yok Pablo. Sehe tuu êrlo yok uje titim olak. Kimiji ahakörlo asa yarta waa je iich otsii sirkunsisyon par eeshilo olak hnitewihi Porrosht ahir, ich shi ebitilo uje Cristo ye jukur par ishi olak hnitew. <sup>3</sup>Sehe titim olak. Nos wir hnakirbo uje oshuu oshiyokör ir yarta ich tyenij nos oshiyokör erze ley uje Moisés chichewkite. <sup>4</sup>Olak shi ebitilo uje erze ley ishi olak hnitewihi Porrosht ahir. Kimiji ahakörlo uhulo itsorz ich shi moymlo Cristo, hn shi moymlo toy erze uje Porrosht chibitkite uje shi ye otiislo Cristo par uje olak owich de Porrosht ahir. <sup>5</sup>Eyok ye yotiis Cristope



heke Porrosht Ichibich takashim eyok uje yiyem par yitir Porrosht ahir nehe. <sup>6</sup>Eyok uje ye yotiis Jesucristo kimiji eyok yarta de waa je iich otsii sirkunsisyon o kimiji nihyok ich shi itsye, ye latikish. Shi uje ye yotiis Jesucristo hn yahmur yewo, wichi uje om.

<sup>7</sup>Wap shish ahmürlo uje ich üru hn ahakörlo. ¿Yeekpo duhu moymlö uje ich üru? <sup>8</sup>Erze ahwoso uje shuu moymlö uje ich üru ye tära Porroshtpe uje chiihla olak wap par uje amsahalo par olak ir aabo. <sup>9</sup>Ese uje sehnýer olak ir ahwoso ich shi itso pan eyhita. Pan eyhita pikaap shuu ese erint tir poörc, hn ir ahwoso pikaap ich uhurc shuu olak moymlö uje ich üru. <sup>10</sup>Yok ye tokotiis uje eyok Irhich tyenij takashim olak par uje shuu olak eyuwo tisir uje om itso yok. Deeych yet nehe hn Porrosht sepyer pishi ese uje shi sehnýer olak. <sup>11</sup>Pishibo watsaklo, kimiji tanimiräha titim oso par uje ochibite ör yar waa je iich otsii sirkunsisyon ich ye wir israel oso oniyokör mihnikihí yokpe, hn ye olitak uje shi Jesús nohmira uje ishi ör hnitewihi Porrosht ahir uje tooho krus eeychni, per oshiyokör mihnikihí yok pork ye tiyokoräha osope par uje ochibite ör yar. <sup>12</sup>Erze uje shish sehe odihokos olak wir uje sehe tuu odiyuhu ör iti shi itso uje oshiyokihí wöjo ochiyuhu iti.

<sup>13</sup>Pishibo watsaklo, Porrosht chiihla olak par uje ye erze ley dii olak delohope. Ye ompe uje ebitilo uje Porrosht chiyuhu olak shuu itsorz shi par uje ahakörlo uje ich mihnüwo. Ich ma om uje ahmürloye hn akashimloye. <sup>14</sup>Pork Porrosht ahwoso tata im: —Ahmür yewo ich shi uhu itso uje ahmür owa.— Uje ahakörlo uhulo itsorz ich ye aluwelo erze ley uje Moisés chichewkite. <sup>15</sup>Per uje etakloye hn ahakosloye ich shi itso uje eliloye. Abeylship olak par uje ye ehniloye. <sup>16</sup>Ma om uje ahakörlo uje Porrosht Ichibich tatim olak hn ye ahakörlo erze uje ich mihnüwo uje ahmürloni, <sup>17</sup>pork erze kuche mihnüwo uje de oso ör aho ye nahmürpe erze uje Porrosht Ichibich sahmür, hn Porrosht Ichibich itspo ye nahmürpe erze kuche mihnüwo uje de oso ör aho uje otsahmür oshiyokör. Erze osiyer ode olak aho hn shish odaliye, heke ye olak pwelpe ahakörlo uje ahmürlo. <sup>18</sup>Per kimiji asimlo Porrosht Ichibich par uje iyeebe hn ekähalo ir ijich ich erze ley ye dii olak delohope. <sup>19</sup>Ich imeheeych uje erze kuche uje de oso ör aho ich mihnüwo. Ich om uje hnakirbich umuhu nerähta ahir hn ich om toy uje timcharrza umuhu dabich ahir per ich mihnik uje ye onöyhi pishye ahirpe, shi omuhuye ahir. Ich mihnik uje otorähaye. Ich mihnik uje timcher timcher oyhí yër ahir, hn ich mihnik uje hnakirbo hnakirbo öyhiye ahir. Ich mihnik uje yeek sahat loshipit, hn ich mihnik uje yanak ishim ire loshipit par shuu sahat ire. Ich mihnik toy uje pikihnino hn pikihnine oshiyokorihíye oshuu itsorz. Ich mihnik uje shi oshuu deyuwo tisir shi par uje omuhu timcher ör ahir, hn timcher ör itspo, ich mihnik uje shi oshuu deyuwo tisir par uje omuhu hnakirbo ör ahir. <sup>20</sup>Ich mihnik uje oteeychäha

kojano po ochii ir porroshtihí, hn ich m̃hnik uje oshiyokōr oshuu ire itso meriko hn oteychāha topo hn demonyo ochii ir porroshtihí. Ich m̃hnik uje shish otsitakye, hn ich m̃hnik uje oshiyokosye. Ich m̃hnik uje otsahmūrpa opota kuche. Ich m̃hnik uje ochesdelo shichish, hn ich m̃hnik uje onarim ire sehe oduhu ire ma deyo. Ich m̃hnik uje oshuu oso otsehek ire, hn ich m̃hnik uje oshiyokorāha oso ōr ahwoso uje ich ye ūrpe par oshuu ōya ire par oshiyokōr weeta yata. <sup>21</sup> Ich m̃hnik uje opota yewo ōr kushjāro hn ich m̃hnik uje oshuu yikich sēhi ire. Ich m̃hnik uje oshiyokōr ōr ahmiyo par oteychāha kojano po ochii ir porroshtihí hn ich m̃hnik nos wir kuche yewo uje itso erze. Titim olakni hn ele ahle ich titim olakpo. Nos wir erze uje oshiyokōr oshuu itsorz ich ñhyok ōr owich Porrosht ahir.

<sup>22</sup> Porrosht Ichibich ye duhu ahakōrlope erze m̃hnūwo duhu ilorz. Wichí shuu ahmūrloye, hn shuu olak aho kiis, hn shuu olak aho kiisihi Porrosht. Wichí shuu entiloye, hn shish shuu olak ile om. Wichí shuu ahakōrlo omihí oso yewo, hn shuu nos ahakōrlo uje athilo. <sup>23</sup> Wichí ye duhu olak ehnitope, hn shuu erahalo abeylo olak par uje ye ahakōrlope uje ich m̃hnik. Ñhyok ye leyirāsh par uje sontew erze uje Porrosht Ichibich shiyokōrīhi eyok aho. <sup>24</sup> Erze uje ye olotiis Jesucristope wir shi ōr itso uje otoy oyehe krus eeych pork oym deluu uje m̃hnū. <sup>25</sup> Uje yibitilo uje Porrosht Ichibich iyeebe hn yiyehelo ir ñer, heke tyenij yiyokōrlo uje Porrosht Ichibich tatim eyok. <sup>26</sup> Ye eyok narim eyok hn ye yuhu yewo onarim eyok hn ye yobita erze uje ōr deyo ōr ibiyo.

### Porrosht aabo tyenij otakashimye.

**6** <sup>1</sup> Pishibo watsaklo, uje eyok leshtik yeēk ye ewenta erze kuche m̃hnūwo hn shiyokōr, ich olak uje ahakōrlo uje Porrosht Ichibich sahmūr tyenij akitlo ire per ye atsirāhalo olak ahwoso uje akitlo ire hn uhulo niyokōr uje Porrosht sahmūr. Kal olak nohm̃ir tyenij tibey ire par uje ye niyokōr uje m̃hnik toy. <sup>2</sup> Akashimloye. Uje ahakōrlo uhulo itsorz ich ahakōrlo erze ley uje Cristo chibitkite. <sup>3</sup> Kimiji yeēk narim ire chibite ire uje ich dich per wichí ye dichpe ich shi sehñyēr ire. <sup>4</sup> Kal olak nohm̃ir tyenij teychim debiyo kimiji tokole om o kimiji ye tokolpe, heke ich olak aho kiisihi olak ibiyo hn ye atha uje ebiyo ma tokole om je ese yet. <sup>5</sup> Kal olak nohm̃ir tyenij tibey uje shiyokōr par uje tokole om.

<sup>6</sup> Nos wir erze uje ochunt Porrosht ahwoso tyenij otakashim ese uje shiyokorāha ōr oshim ire uje ich om. <sup>7</sup> Ye ehnyērlo olak. Ñhyok uje yeēk pwele sehñyēr Porrosht. Erze uje ochukwēr tyenij ochekushu nehe. <sup>8</sup> Heke uje yeēk shiyokōr uje m̃hnūwo ich shi itso uje chukwēr jōro uje m̃hnūwo. Uje terihí ishirit nehe par uje chekushu ich shi chekushu ir jōro ee uje ich m̃hnūwo. Shiyokōr uje m̃hnik heke erze m̃hnūwo tyenij seya ire waa urhuta bahluta ehēt nehe. Uje yeēk shiyokōr uje Porrosht

Ichibich sahmūr ich shi itso uje chukwēr ir jōro uje ich om heke tyenij chekushu ir ee uje ich om. Wichí ese ir ikirīt uje yelij nihna ire. <sup>9</sup>Ye yuhu patim eyok uje yiyokōrlo uje ich om pork uje terihi ishirīt nehe ich eyok premyo de kimijí ye yukwimpe. <sup>10</sup>Par uje eyok premyo de, uje eyok pwele ich shish nos tyenij yakashimlo oso, per ma tyenij yiyokōrlo om par erze Porrosht aabo yewo.

**Porrosht shuu daabo ōr iluu kineheni.**

<sup>11</sup>Ich hutita uhurc heke tichew t̄ira p̄ihmta. Eychimlo ehni piche ich deyo heke erahalo uje ana hutita t̄ara yok.

<sup>12</sup>Wir erze uje onarim ire sehe oduhu oniyokōr olak yarta waa je iich otsii sirkunsisyon. Sehe oniyokōr oduhu ilorz shi par uje erze oso ye oniyokōr mihnikīhi ōrpe uje otsanimirāha otatim oso uje Jesús tooho krus eeych par uje ishi ōr hnitewihi Porrosht ahir. <sup>13</sup>Erze uje sehe oniyokōr ōr yar hn erze uje ōr yarta de tyenij oshiyokōr asa ley waa je Moisés chichewkite, per ye oniyokōrpe. Shi sehe odibite olak yarta par uje ōr pwele otata uje ochibite olak yar hn onarim ire oshuu itsorz. <sup>14</sup>Par yok ich ye tahmūrpe uje yok narim yok. Shi tahmūr uje yok narim eyok Irhīch Jesucristo uje tooho krus eeychkite. Ich shi itso uje erze kuche mihnūwo uje de nāhu írmo tooho ese krus eeych toy heke ich shi itso uje tikiti tokōya Cristo krus eeych pork tokoym erze kuche mihnūwo uje de nāhu írmo. <sup>15</sup>Ich ye latikish kimijí asa yarta de waa je iich otsii sirkunsisyon o kimijí nīhyok. Ese uje nos oso ōr nesita wichí uje Porrosht shuu ōr iluu kinēhe ich shuu ōr ahlo. <sup>16</sup>Sehe tuu Porrosht duhu nos wir ōr aho kiis erze uje shi ye olotiis Cristope hn ye odibite ōr yarta itso uje tichew tibite ana hutita. Sehe tuu Porrosht nuuna uje ōr losuhlaabo hn dosir ōr toy. Erze Porrosht ir aabo wir uje Porrosht chiihla ōr.

<sup>17</sup>Ich ye tahmūrpe uje oshiyokos yokpo nehe shi pork sehe odibite erze Porrosht aabo ōr yar. Ahnūwo pobilo de piyūhurrza pork oso otsepyēr yok. Erze pobilo shuu imeheeych uje tanimirāha titim oso Jesús per ye titim oso uje tyenij ochibite asa yartape waa je iich otsii sirkunsisyon heke ich otsitak yok hn otsepyēr yok oshuu itsorz.

<sup>18</sup>Pishibo watsaklo, sehe tuu eyok Irhīch Jesucristo dosir olak. Shi ahnūwo uje titim olak.